

宜詰責曰汝之書契與我國不同雖不得一一詳解然有不順之語汝等向慕我國而來朝何發如此之言甚為不當以此嚴辭詰責何如且通事等並令遞去改遣他事知者以示整肅之意左右相議同傳曰知道○戊子 上詣老教殿行晝茶禮○夜巽方有氣如火○庚寅臺諫啓曰昨日傳教以為通事房守等倭人回還後推考此則機關重大矣通事房守等我國之事常常漏洩使倭人發怒其訴鄭式之書曰式常言我今之大聖人皇帝之族親也此事若通事不說則何從而知之也若緩治則後弊無窮通事房守等須於倭人未還之前窮推痛治一以絕倭人輕侮之心一以示國家之嚴威傳曰倭館通事房守等痛治事上下之意皆同公禮曹以通事房守等有誤事故轉達推考事先言于倭人後推之可也○辛卯日暈兩珥○壬辰判義禁府事金瑄等啓曰高靈監彭齡之事其初延安府居私奴奉元以其女順今強奸事來呈司憲府行移本道推之則奉元之弟有山為中媒云但其為中媒不分明許諾故高靈監以娶順今事往奉元之家則其家人成群出打高靈監退避隣舍有山率高靈監引入于奉元之房而順今隨入云其父供招曰我女子已經人其強奸與否未可知也中媒及圍繞之人則雖